

禪宗永嘉集

證道  
歌附

無相大師行狀

翰林學士朝散大夫行左司諫知制誥同修國史  
判史館事上柱國南陽郡開國侯食邑一千一百  
戶賜紫金魚袋楊億述

温州永嘉玄覺禪師者永嘉人也。姓戴氏。卯歲出家。  
徧探三藏。精天台止觀圓妙法門。於四威儀中。常冥  
禪觀。後因左谿朗禪師激勵。與東陽策禪師同詣曹  
谿。初到。振錫攜瓶。繞祖三匝。祖曰。夫沙門者。具三千  
威儀。八萬細行。大德自何方而來。生大我慢。師曰。生  
死事大。無常迅速。祖曰。何不體取無生。了無速乎。曰。

無相大師行狀

一

體卽無生了。本無速。祖云。如是如是。于時大眾無不  
愕然。師方具威儀參禮。須臾告辭。祖曰。返太速乎。師  
曰。本自非動。豈有速耶。祖曰。誰知非動。曰。仁者自生  
分別。祖曰。汝甚得無生之意。曰。無生豈有意耶。祖曰。  
無意誰當分別。曰。分別亦非意。祖歎曰。善哉善哉。少  
留一宿。時謂一宿覺矣。策公乃留師。翌日下山。迴溫  
江。學者輻湊。號真覺大師。著禪宗悟修圓旨。自淺之  
深。慶州刺史魏靜緝而序之。成十篇。自爲永嘉集。及  
證道歌一首。並盛行於世云爾。

禪宗永嘉集序

唐慶州刺史魏靜述

聞夫慧門廣闢。理絕色相之端。覺路遙望。跡晦名言之表。悲夫能仁示現。應化無方。開妙典於三乘。暢真詮於八部。所以發揮至蹟。懸梵景於昏衢。光闡大猷。泛禪波於欲浪。是以金棺揜耀。玉毫收彩。孤標靈鷲之英。獨負成麟之業者。其唯大師歟。大師俗姓戴氏。永嘉人也。少挺生知。學不加思。幼則遊心三藏。長則通志大乘。三業精勤。偏弘禪觀。境智俱寂。定慧雙融。遂使塵靜昏衢。波澄玄海。心珠道種。瑩七淨以交輝。

禪宗永嘉集序

二

戒月悲花。耿三空而列耀。加復霜松。潔操水月。虛襟布衣。蔬食忘身。爲法愍傷。含識物物斯安。觀念相續。心心靡間。始終抗節。金石方堅。淺深心要。貫花慚潔。神徹言表。理契寰中。曲己推人。順凡同聖。則不起滅定。而秉護四儀。名重當時。道扇方外。三吳碩學。輻輳禪階。八表高人。風趨理窟。靜往因薄宦。親承接足。恨未盡於方寸。俄赴京畿。自爾已來。幽冥遽隔。永慨玄眸。積翳忽喪。金錫欲海。洪濤遄沈。智檝遺文。尙在龕室。寂寥嗚呼。哀哉痛纏心腑。所嗟一方眼滅。七眾何依。德音無聞。遠增悽感。大師在生。凡所宣紀。總有十

篇集爲一卷。庶同歸郢悟者。得意忘言耳。今略紀斯文。多有謬誤。用俟明哲。非者正之。

大章分爲十門。慕道志儀第一。夫欲修道。先須立志。及事師儀則。彰乎軌訓。故標第一。慕道儀式。戒憍奢意第二。初雖立志修道。善識軌儀。若三業憍奢。妄心擾動。何能得定。故次第二。明戒憍奢意也。淨修三業第三。前戒憍奢。略標綱要。今子細檢責。令麤過不生。故次第三。明淨修三業。戒乎身口意也。奢摩他頌第四。前已檢責身口。令麤過不生。次須入門。修道漸次。不出定慧五種起心。六種料簡。

禪宗永嘉集序

三

故次第四。明奢摩他頌也。毗婆舍那頌第五。非戒不禪。非禪不慧。上旣修定。定久慧明。故次第五。明毗婆舍那頌也。優畢又頌第六。偏修於定。定久則沈。偏學於慧。慧多心動。故次第六。明優畢又頌。等於定慧。令不沈動。使定慧均等。捨於二邊。三乘漸次第七。定慧旣均。則寂而常照。三觀一心。何疑不遣。何照不圓。自解雖明。悲他未悟。悟有淺深。故次第七。明三乘漸次也。理事不二第八。三乘悟理。理無不窮。窮理在事。了事卽理。故次第八。明事理不二。卽事而真。用祛倒見也。勸友人書第九。事理旣

融內心自瑩。復悲遠學虛擲寸陰。故次第九明勸友人書也。發願文第十。勸友雖是悲他。專心在一。情猶未普。故次第十明發願文誓度一切也。

案永嘉集明季入藏。幽溪尊者爲之註。已盛行於世。顧幽溪註本。重加編次。勸友人書則全刪。發願文則分而爲二。篇目旣已易置。字句亦多刪節。與古本稍殊矣。竊謂幽溪註本誠爲別具手眼。而古本流傳千餘載。似亦未可遽廢。今依藏本校刻。俾與註本並行云。北京刻經處附識。

禪宗永嘉集

唐慎水沙門玄覺撰


慕道志儀第一

先觀三界生厭離故。次親善友。求出路故。次朝晡問訊。存禮數故。次審乖適如何。明侍養故。次問何所作。爲明親承事故。次瞻仰無怠。生殷重故。次數決心要。爲正修故。次隨解呈簡。爲識邪正故。次驗氣力。知生熟故。次見病生疑。堪進妙藥故。委的審思。求諦當故。日夜精勤。恐緣差故。專心一行。爲成業故。亡身爲法。爲知恩故。如其信力輕微。意無專志。麤行淺解。汎漾

禪宗永嘉集

隨機觸事。則因事生心。緣無則依無息念。既非動靜之等觀。則順有無之得失。然道不浪階。隨功涉位。具戒僞奢意第二

衣食由來。長養栽種。墾土掘地。鹽煮蠶蛾。成熟施爲。損傷物命。令他受死。資給自身。但畏饑寒。不觀死苦。殺他活己。痛哉可傷。兼用農功。積力深厚。何獨含靈致命。亦乃信施難消。雖復出家。何德之有。噫。夫欲出超三界。未有絕塵之行。徒爲男子之身。而無丈夫之志。但以終朝擾擾。竟夜昏昏。道德未修。衣食斯費。上乖弘道。下闕利生。中負四恩。誠以爲恥。故智人思之。



寧有法死。不無法生。徒自迷癡。貴身賤法耳。

淨修三業第三

貪瞋邪見。意業。妄言綺語。兩舌惡口。口業。殺盜婬身業。夫欲志求大道者。必先淨修三業。然後於四威儀中。漸次入道。乃至六根所對。隨緣了達。境智雙寂。冥乎妙旨。云何淨修身業。深自思惟。行住坐卧。四威儀中。檢攝三愆。無令漏失。慈悲撫育。不傷物命。水陸空行。一切含識。命無大小。等心愛護。蠢動蜎飛。無令毀損。危難之流。殷勤拔濟。方便救度。皆令解脫。於他財物。不與不取。乃至鬼神。隨有主物。一鍼一草。終無故

禪宗永嘉集

二

犯貧窮乞丐。隨己所有。敬心施與。令彼安隱。不求恩報。作是思惟。過去諸佛。經無量劫。行檀布施。象馬七珍。頭目髓腦。乃至身命。捨而無吝。我今亦爾。隨其施與。歡喜供養。心無吝惜。於諸女色。心無染著。凡夫顛倒。爲慾所醉。耽荒迷亂。不知其過。如捉花莖。不悟毒蛇。智人觀之。毒蛇之口。熊豹之手。猛火熱鐵。不以爲喻。銅柱鐵牀。焦背爛腸。血肉糜潰。痛徹心髓。作如是觀。唯苦無樂。革囊盛糞。膿血之聚。外假香塗。內唯臭穢。不淨流溢。蟲蛆住處。鮑肆厠孔。亦所不及。智者觀之。但見髮毛爪齒。薄皮厚皮。肉血汗淚。涕唾膿脂。筋

脈腦膜。黃痰白痰。肝膽骨髓。肺脾腎胃。心膏膀胱。大腸小腸。生藏熟藏。屎尿臭處。如是等物。一一非人。識風鼓擊。妄生言語。詐爲親友。其實怨妬。敗德障道。爲過至重。應當遠離。如避怨賊。是故智者觀之。如毒蛇想。寧近毒蛇。不親女色。何以故。毒蛇殺人。一死一生。女色繫縛。百千萬劫。種種楚毒。苦痛無窮。諦察深思。難可附近。是以智者切檢三愆。改往修來。背惡從善。不殺不盜。放生布施。不行婬穢。常修梵行。日夜精勤。行道禮拜。歸憑三寶。志求解脫。於身命財。修三堅法。知身虛幻。無有自性。色卽是空。誰是我者。一切諸法。

但有假名。無一定實。是我身者。四大五陰。一一非我。和合亦無。內外推求。如水聚沫。浮泡陽燄。芭蕉幻化。鏡像水月。畢竟無人。無明不了。妄執爲我。於非實中。橫生貪著。殺生偷盜。婬穢荒迷。竟夜終朝。矻矻造業。雖非真實。善惡報應。如影隨形。作是觀時。不以惡求。而養身命。應自觀身。如毒蛇想。爲治病故。受於四事。身著衣服。如裹癰瘡。口飧滋味。如病服藥。節身儉口。不生奢泰。聞說少欲。深樂修行。故經云。少欲頭陀。善知止足。是人能入賢聖之道。何以故。惡道眾生。經無量劫。闕衣乏食。叫喚號毒。饑寒切楚。皮骨相連。我今



暫闕未足爲苦。是故智者貴法賤身。勤求至道。不顧形命。是名淨修身業。云何淨修口業。深自思惟。口之四過。生死根本。增長眾惡。傾覆萬行。遞相是非。是故智者欲拔其源。斷除虛妄。修四實語。正直。柔輒。和合。如實。此之四語。智者所行。何以故。正直語者。能除綺語。柔輒語者。能除惡口。和合語者。能除兩舌。如實語者。能除妄語。正直語者有二。一。稱法說。令諸聞者信解明了。二。稱理說。令諸聞者除疑遣惑。柔輒語者亦二。一者安慰語。令諸聞者歡喜親近。二者宮商清雅。令諸聞者愛樂受習。和合語者亦二。一事和合者。見

鬪諍人。諫勸令捨。不自稱譽。卑遜敬物。二。理和合者。見退菩提心人。殷勤勸進。善能分別菩提煩惱平等一相。如實語者亦二。一。事實者。有則言有。無則言無。是則言是。非則言非。二。理實者。一切眾生。皆有佛性。如來涅槃。常住不變。是以智者行四實語。觀彼眾生。曠劫已來。爲彼四過之所顛倒。沈淪生死。難可出離。我今欲拔其源。觀彼口業。唇舌牙齒。咽喉臍響。識風鼓擊。音出其中。由心因緣。虛實兩別。實則利益。虛則損滅。實是起善之根。虛是生惡之本。善惡根本。由口言詮。詮善之言。名爲四正。詮惡之語。名爲四邪。邪則

就苦。正則歸樂。善是助道之緣。惡是敗道之本。是故智者要心扶正。實語自立。誦經念佛。觀語實相。言無所存。語默平等。是名淨修口業。云何淨修意業。深自思惟。善惡之源。皆從心起。邪念因緣。能生萬惡。正觀因緣。能生萬善。故經云。三界無別法。惟是一心作。當知心是萬法之根本也。云何邪念。無明不了。妄執爲我。我見堅固。貪瞋邪見。橫計所有。生諸染著。故經云。因有我故。便有所。因我所故。起於斷常六十二見。見思相續。九十八使。三界生死。輪迴不息。當知邪念。眾惡之本。是故智者制而不隨。云何正觀。彼我無差。

色心不二。菩提煩惱。本性非殊。生死涅槃。平等一照。故經云。離我我所。觀於平等。我及涅槃。此二皆空。當知諸法。但有名字。故經云。乃至涅槃。亦但有名字。又云。文字性離。名字亦空。何以故。法不自名。假名詮法。法既非法。名亦非名。名不當法。法不當名。名法無當。一切空寂。故經云。法無名字。言語斷故。是以妙相絕名。真名非字。何以故。無爲寂滅。至極微妙。絕相離名。心言路絕。當知正觀還源之要也。是故智者正觀。因緣萬惑斯遣。境智雙忘。心源淨矣。是名淨修意業。此應四儀六根所對。隨緣了達。入道次第云爾。

奢摩他頌第四

恰恰用心時。恰恰無心用。無心恰恰用。常用恰恰無。夫念非忘塵而不息。塵非息念而不忘。塵忘則息念而忘。念息則忘塵而息。忘塵而息。息無能息。息念而忘。忘無所忘。忘無所忘。塵遣非對。息無能息。念滅非知。知滅對遣。一向冥寂。閔爾無寄。妙性天然。如火得空。火則自滅。空喻妙性之非相。火比妄念之不生。其辭曰。忘緣之後寂寂。靈知之性歷歷。無記昏昧昭昭。契真本空的的。惺惺寂寂是。無記寂寂非。寂寂惺惺是。亂想惺惺非。若以知知寂。此非無緣知。如手執如

意非無如意手。若以自知知。亦非無緣知。如手自作拳。非是不拳手。亦不知知寂。亦不自知知。不可爲無知。自性了然故。不同於木石。手不執如意。亦不自作拳。不可爲無手。以手安然故。不同於兔角。復次修心漸次者。夫以知知物。物在知亦在。若以知知知。知知則離物。物離猶知在。起知知於知。後知若生時。前知早已滅。二知既不並。但得前知滅。滅處爲知境。能所俱非真。前則滅滅引知。後則知知續滅。生滅相續。自是輪迴之道。今言知者。不須知知。但知而已。則前不接滅。後不引起。前後斷續。中間自孤。當體不顧。應時

消滅。知體既已滅。豁然如托空。寂爾少時間。唯覺無所得。卽覺無覺。無覺之覺。異乎木石。此是初心處。冥然絕慮。乍同死人。能所頓忘。纖緣盡淨。聞爾虛寂。似覺無知。無知之性。異乎木石。此是初心處。領會難爲。入初心時。三不應有。一惡。謂思惟世間五欲等因緣。二善。謂思惟世間雜善等事。三無記。謂善惡不思。聞爾昏住。戒中三應須具。一攝律儀戒。謂斷一切惡。二攝善法戒。謂修一切善。三饒益有情戒。謂誓度一切眾生。定中三應須別。一安住定。謂妙性天然。本自非動。二引起定。謂澄心寂怕。發瑩增明。三辦事定。謂定

水凝清。萬像斯鑑。慧中三應須別。一人空慧。謂了陰非我。卽陰中無我。如龜毛兔角。二法空慧。謂了陰等諸法緣假非實。如鏡像水月。三空空慧。謂了境智俱空。是空亦空。見中三應須識。一空見。謂見空而見非空。二不空見。謂見不空而見非不空。三性空見。謂見自性而見非性。偏中三應須簡。一有法身。無般若解脫。二有般若。無解脫法身。三有解脫。無法身般若。有一無二。故不圓。不圓故非性。又偏中三應須簡。一有法身般若。無解脫。二有般若解脫。無法身。三有解脫法身。無般若。有二無一。故不圓。不圓故非性。圓中三

應須具。一法身不癡卽般若。般若無著卽解脫。解脫寂滅卽法身。二般若無著卽解脫。解脫寂滅卽法身。法身不癡卽般若。般若無著卽解脫。舉一卽具三。言三體卽一。此因中三德。非果上三德。欲知果上三德。法身有斷德。邇因斷惑而顯德。故名斷德。自受用身有智德。具四智真實功德故。他化二身有大恩德。他受用身。於十地菩薩有恩德故。三種化身。於菩薩二乘異生有恩故。三諦四智。除成所作智。爲緣俗諦故。然法無淺深。而照之有明昧。心非垢淨。而解之有迷悟。初入初心。

迷復何非淺。終契圓理。達始何非深。迷之失理而自差。悟之失差而卽理。迷悟則同其致。故有漸次名焉。復次初修心人入門之後。須識五念。一故起。二慣習。三接續。四別生。五卽靜。故起念者。謂起心思惟世間五欲及雜善等事。慣習念者。謂無心故憶。忽爾思惟善惡等事。接續念者。謂慣習忽起。知心馳散。又不制止。更復續前思。惟不住。別生念者。謂覺知前念是散亂。卽生慚愧改悔之心。卽靜念者。謂初坐時。更不思惟世間善惡及無記等事。卽此作功。故言卽靜。慣習一念。初生者多。接續故起二念。懈怠者有。別生一念。

慚愧者多。卽靜一念。精進者有。慣習。接續。故起。別生。四念爲病。卽靜一念爲藥。雖復藥病有殊。總束俱名爲念。得此五念停息之時。名爲一念相應。一念者。靈知之自性也。然五念是一念。枝條。一念是五念根本。復次若一念相應之時。須識六種料簡。一識病。二識藥。三識對治。四識過生。五識是非。六識正助。第一病者有二種。一緣慮。二無記。緣慮者。善惡二念也。雖復差殊。俱非解脫。是故總束名爲緣慮。無記者。雖不緣善惡等事。然俱非真心。但是昏住。此二種名爲病。第二藥者。亦有二種。一寂寂。二惺惺。寂寂謂不念外境。

善惡等事。惺惺謂不生昏住無記等相。此二種名爲藥。第三對治者。以寂寂治緣慮。以惺惺治昏住。用此二藥對破二病。故名對治。第四過生者。謂寂寂久生昏住。惺惺久生緣慮。因藥發病。故云過生。第五識是非者。寂寂不惺惺。此乃昏住。惺惺不寂寂。此乃緣慮。不惺惺不寂寂。此乃非但緣慮。亦乃入昏而住。亦寂寂亦惺惺。非唯歷歷兼復寂寂。此乃還源之妙性也。此四句者。前三句非。後一句是。故云識是非也。第六正助者。以惺惺爲正。以寂寂爲助。此之二事。體不相離。猶如病者因杖而行。以行爲正。以杖爲助。夫病者

欲行。必先取杖。然後方行。修心之人。亦復如是。必先息緣慮。令心寂寂。次當惺惺。不致昏沈。令心歷歷。歷歷寂寂。二名一體。更不異時。譬夫病者欲行。闕杖不可。正行之時。假杖故能行。作功之者。亦復如是。歷歷寂寂。不得異時。雖有二名。其體不別。又曰。亂想是病。無記亦病。寂寂是藥。惺惺亦藥。寂寂破亂想。惺惺治無記。寂寂生無記。惺惺生亂想。寂寂雖能治亂想。而復還生無記。惺惺雖能治無記。而復還生亂想。故曰。惺惺寂寂是無記。寂寂非寂寂。惺惺是亂想。惺惺非寂寂。爲助。惺惺爲正。思之。復次料簡之後。須明識一

念之中五陰。謂歷歷分別。明識相應。卽是識陰。領納在心。卽是受陰。心緣此理。卽是想陰。行用此理。卽是行陰。汙穢真性。卽是色陰。此五陰者。舉體卽是一念。此一念者。舉體全是五陰。歷歷見此一念之中。無有主宰。卽人空慧。見如幻化。卽法空慧。是故須識此五念及六種料簡。願勿嫌之。如取真金。明識瓦礫。及以僞寶。但盡除之。縱不識金。金體自現。何憂不得。

毘婆舍那頌第五

夫境非智而不了。智非境而不生。智生則了境而生。境了則智生而了。智生而了。了無所了。了境而生。生

無能生。生無能生。雖智而非有。了無所了。雖境而非無。無卽不無。有卽非有。有無雙照。妙悟蕭然。如火得薪。彌加熾盛。薪喻發智之多。境火比了境之妙。智其辭曰。達性空而非縛。雖緣假而無著。有無之境。雙照中觀之心。歷落若智了於境。卽是境空智。如眼了花空。是了花空眼。若智了於智。卽是智空智。如眼了眼空。是了眼空眼。智雖了境空。及以了智空。非無了境智。境空智猶有。了境智空智。無境智不了。如眼了花空。及以了眼空。非無了花眼。花空眼猶有。了花眼空眼。無花眼不了。復次一切諸法。悉假因緣。因緣所生。

皆無自性。一法旣爾。萬法皆然。境智相從。于何不寂。何以故。因緣之法。性無差別。故今之三界輪迴。六道昇降。淨穢苦樂。凡聖差殊。皆由三業四儀六根所對。隨情造業。果報不同。善則受樂。惡則受苦。故經云。善惡爲因。苦樂爲果。當知法無定相。隨緣構集。緣非我有。故曰性空。空故非異。萬法皆如。故經云。色卽是空。四陰亦爾。如是則何獨凡類緣生。亦乃三乘聖果。皆從緣有。是故經云。佛種從緣起。是以萬機叢溱。達之者則無非道場。色像無邊。悟之者則無非般若。故經云。色無邊故。當知般若亦無邊。何以故。境非智而不



了。智非境而不生。智生則了境而生。境了則智生而了。智生而了。了無所了。了境而生。生無能生。生無能生。則內智寂寂。了無所了。則外境如如。如寂無差。境智冥一。萬累都泯。妙旨存焉。故經云。般若無知。無所不知。如是則妙旨非知。不知而知矣。

優畢又頌第六

夫定亂分歧。動靜之源莫二。愚慧乖路。明闇之本非殊。羣迷從暗而背明。捨靜以求動。眾悟背動而從靜。捨暗以求明。明生則轉愚成慧。靜立則息亂成定。定立由乎背動。慧生因乎捨暗。暗動連繫於煩籠。靜明

相趨於物表。物不能愚。功由於慧。煩不能亂。功由於定。定慧更資於靜明。愚亂相纏於暗動。動而能靜者。卽亂而定也。暗而能明者。卽愚而慧也。如是則暗動之本無差。靜明由茲合道。愚亂之源非異。定慧於是同宗。宗同則無緣之慈。定慧則寂而常照。寂而常照則雙與。無緣之慈則雙奪。雙奪故優畢又。雙與故毗婆奢摩。以奢摩他故。雖寂而常照。以毗婆舍那故。雖照而常寂。以優畢又故。非照而非寂。照而常寂故。說俗而卽真。寂而常照故。說真而卽俗。非寂非照故。杜口於毗耶。復次觀心十門。初則言其法爾。次則出其

觀體。三則語其相應。四則警其上慢。五則誠其疏忽。六則重出觀體。七則明其是非。八則簡其詮旨。九則觸途成觀。十則妙契玄源。第一言其法爾者。夫心性虛通。動靜之源莫二。眞如絕慮。緣計之念非殊。惑見紛馳。窮之則唯一寂。靈源不狀。鑒之則以千差。千差不同。法眼之名自立。一寂非異。慧眼之號斯存。理量雙消。佛眼之功圓著。是以三諦一境。法身之理恆清。三智一心。般若之明常照。境智冥合。解脫之應隨機。非縱非橫。圓伊之道玄會。故知三德妙性。宛爾無乖。一心深廣難思。何出要而非路。是以卽心爲道者。可

謂尋流而得源矣。第二出其觀體者。祇知一念卽空。不空。非空。非不空。第三語其相應者。心與空相應。則譏毀讚譽。何憂何喜。身與空相應。則刀割香塗。何苦何樂。依報與空相應。則施與劫奪。何得何失。心與空不空相應。則愛見都忘。慈悲普救。身與空不空相應。則內同枯木。外現威儀。依報與空不空相應。則永絕貪求。資財給濟。心與空不空非空非不空相應。則實相初明。聞佛知見。身與空不空非空非不空相應。則一塵入正受。諸塵三昧起。依報與空不空非空非不空相應。則香臺寶閣。巖土化生。第四警其上慢者。若

不爾者。則未相應也。第五誠其疏忽者。然渡海應須上船。非船何以能渡。修心必須入觀。非觀無以明心。心尙未明。相應何日。思之勿自恃也。第六重出觀體者。祇知一念卽空。不空。非有非無。不知卽念卽空。不空。非非有。非非無。第七明其是非者。心不是。有心不是。無。心不非。有心不非。無。是有是無。卽墮是非。有非無。卽墮非。如是祇是非之非。未是非是非之是。今以雙非破兩是。是破非。是猶是非。又以雙非破兩非。非破非。非卽是。是如是祇是非是非之是。未是非不非。不非不是。不是是非之惑。繇微難見。神清

慮靜。細而研之。第八簡其詮旨者。然而至理無言。假文言以明其旨。旨宗非觀。藉修觀以會其宗。若旨之未明。則言之未的。若宗之未會。則觀之未深。深觀乃會其宗。的言必明其旨。旨宗旣其明會。言觀何得復存耶。第九觸途成觀者。夫再演言辭。重標觀體。欲明宗旨無異。言觀有逐方移。移言則言理無差。改觀則觀旨不異。不異之旨卽理。無差之理卽宗。宗旨一而二名。言觀明其弄引耳。第十妙契玄源者。夫悟心之士。寧執觀而迷旨。達教之人。豈滯言而惑理。理明則言語道斷。何言之能議。旨會則心行處滅。何觀之能

思。心言不能思議者。可謂妙契寔中矣。

三乘漸次第七

夫妙道沖微。理絕名相之表。至真虛寂。量超羣數之外。而能無緣之慈。隨有機而感應。不二之旨。逐根性以區分。順物忘懷。施而不作。終日說示。不異無言。設教多途。無乖一揆。是以大聖慈悲。隨機利物。統其幽致。羣籍非殊。中下之流。觀諦緣而自小。高上之士。御六度而成大。由是品類愚迷。無能自曉。或因說而悟解。故號聲聞。原其所修。四諦而爲本行。觀無常而生恐。念空寂以求安。患六道之輪迴。惡三界之生死。見

苦常懷厭離。斷集恆畏其生。證滅獨契無爲。修道惟論自度。大誓之心未普。攝化之道無施。六和之敬空然。三界之慈靡運。因乖萬行。果闕圓常。六度未修。非小何類。如是則聲聞之道也。或有不因他說。自悟非常。偶緣散而體真。故名緣覺。原其所習。十二因緣而爲本行。觀無明而卽空。達諸行而無作。二因旣非其業。五果之報何疇。愛取有以無疵。老死亦何所累。故能脩然獨脫。靜處幽居。觀物變而悟非常。觀秋零而入真道。四儀庠序。攝心慮以恬愉。性好單棲。憩閑林而自適。不欣說法。現神力以化他。無佛之世出興。作

佛燈之後。燄身惟善寂。意翫清虛。獨宿孤峯。觀緣散滅。利他不普。自益未圓。於下有勝。於上不足。兩非其類。位處中乘。如此辟支佛道也。如其根性本明。玄功宿著。學非博涉。解自生心。心無所緣。而能利物。慈悲至大。愛見之所不拘。終日度生。不見生之可度。一異齊旨。解惑同源。人法俱空。故名菩薩。原其所修。六度而爲正因。行施則盡命傾財。持戒則吉羅無犯。忍辱則深明非我。割截何傷。安耐毀譽。八風不動。精進則勤求至道。如救頭然。自行化他。刹那之頃。無間。禪那則身心寂怕。安般希微。住寂定。以自資。運四儀而利物。智慧則了知緣起。自性無生。萬法皆如。真源至寂。雖知煩惱無可捨。菩提無可取。而能不證無爲。度生長劫。廣修萬行。等觀羣方。下及諦緣。上該不共。大誓之心。普被四攝之道。通收三界。以爲家。括四生而爲子。悲智雙運。福慧兩嚴。超越二乘。獨居其上。如是則大乘之道也。是以一真之理。逐根性以階差。取益隨機。三乘之唱備矣。然而至理虛玄。窮微絕妙。尙非其一。何是於三。不三之三。而言三。不一之一。而言一。一三非三。尙不三。三一之一。亦何一。一不一。自非三。三不三。自非一。非一一。非三不留。非三三非。一不立。

不立之一。本無三。不留之三。本無一。一三本無。無亦無。無無。無本。故妙絕。如是則一何所分。三何所合。合分自於人耳。何理異於言哉。譬夫三獸渡河。河一寧從獸合。復何獨河非獸合。亦乃獸不河分。河尚不成三河。豈得以河而合獸。獸尚不成一獸。豈得以獸而成河。河非獸而何三。獸非河而何一。一河獨包三獸。而河未曾三。三獸共履一河。而獸未嘗一。獸之非一。明其足有短長。河之不三。知其水無深淺。水無深淺。譬法之無差。足有短長。類智之有明昧。如是則法本無三。而人自三耳。今之三乘之初。四諦最標其首。法

之既以無差。四諦亦何非大。而言聲聞觀之。位居其小者哉。是知諦似於河。人之若獸。聲聞最劣。與兔爲儔。雖復奔波。寧窮浪底。未能知其深極。位自居卑。何必觀諦之流。一槩同其成小。如其智照高明。量齊香象者。則可以窮源盡際。煥然成大矣。故知下智觀者。得聲聞果。中智觀者。得緣覺果。上智觀者。得菩薩果。明宗皎然。豈容圖度者矣。是以聲聞見苦而斷集。緣覺悟集散而觀離。菩薩了達真源。知集本無和合。三人同觀四諦。證果之所差殊。良由觀有淺深。對照明其高下耳。是以下乘行下。中上之所未修。上乘行上。

而修中下。中行中下。不修於上。上中下之在人。非諦令其大小耳。然三乘雖殊。同歸出苦之要。聲聞雖小。見愛之惑已祛。故於三界無憂。分段之形滅矣。三明照耀開朗。八萬之劫現前。六通縱任無爲。山壁遊之直度。時復空中行住。或坐卧之安然。汎沼則輕若鴻毛。涉地則猶如履水。九定之功滿足。十八之變隨心。然三藏之佛。望六根清淨位。有齊有劣。同除四住。此處爲齊。若伏無明。三藏則劣。佛尙爲劣。二乘可知。望上斷伏雖殊。於下悟迷有隔。如是則二乘何咎而欲不修者哉。如來爲對大根。引歸寶所。令修種智。同契

圓伊可毀。或譽抑揚當時耳。凡夫不了。預畏被呵。寧知見愛尙存。去二乘而甚遠。雖復言其修道。惑使諸所不祛。非惟身口未端。亦乃心由諂曲。見生自意。解背真詮。聖教之所不依。明師未曾承受。根緣非唯宿習。見解未預生知。而能世智辯聰。談論以之終日。時復牽於經語。曲會私情。縱邪說以誑愚人。撥因果而排罪福。順情則嬉怡生愛。違意則恹懣懷瞋。三受之狀固然。稱位乃傳菩薩。初篇之非未免。過人之釁又繁。大乘之所不修。而復譏於小學。恣一時之強口。謗說之患鏗然。三塗苦輪。報之長劫。哀哉吁哉。言及愴



然悲酸矣。然而達性之人。對境彌加其照。忘心之士。相善不涉其懷。況乎三業之邪。非寧有歷心於塵滴。是以鑒玄之侶。淨三受於心源。滌穢之流。掃七支於身口。無情罔侵塵葉。有識無惱蝸螟。幽澗未足比其清。飛雪無以方其素。眷德若羽羣揚翅。望星月以窮高。棄惡若鱗眾驚鉤。投江瀛而盡底。玄曦慙其照遠。上界惡以緣消。境智合以圓虛。定慧均而等妙。桑田改而心無易。海嶽遷而志不移。而能處憤非喧。凝神挺照。心源朗淨。慧解無方。觀法性而達真如。鑒金文而依了義。如是則一念之中。何法門而不具。如其妙

慧未彰。心無準的。解非契理。行闕超塵。乖法性而順常情。背圓詮而執權說。如是則次第隨機。對根緣而設教矣。是以敘其綱紀。委悉餘所未明。深淺宗途。略言其趣。三乘之學。影響知其分位耳。

事理不二第八

夫妙悟通衢。則山河非壅。迷名滯相。則絲毫成隔。然萬法本源。由來實相。塵沙惑趣。原是眞宗。故物像無邊。般若無際者。以其法性本眞。了達成智故也。譬夫行由通徑。則萬里可期。如其觸物衝渠。則終朝域內。以其不知物有無形之畔。渠有窮虛之域故也。是以

學遊中道。則實相可期。如其執有滯無。則終歸邊見。以其不知有有非有之相。無有非無之實故也。今之色相紛紜。窮之則非相。音聲吼喚。究之則無言。迷之則謂有形聲。悟之則知其闕寂。如是則真諦不乖於事理。卽事理之體元真。妙智不異於了知。卽了知之性元智。然而妙旨絕言。假文言以詮旨。真宗非相。假名相以標宗。譬夫象非雪山。假雪山而類象。此但取其能類耳。豈以雪山而爲象耶。今之法非常而執有。假非有以破常。性非斷而執無。假非無而破斷。類夫淨非水灰。假水灰而洗淨者。此但取其能洗耳。豈以

水灰而爲淨耶。故知中道不偏。假二邊而辨正。斷常非是。寄無有以明非。若有若無言。旣非非有非無。亦何是。信知妙達玄源者。非常情之所測也。何者。夫妄非愚出。真不智生。達妄名真。迷真曰妄。豈有妄隨愚變。真逐智迴。真妄不差。愚智自異耳。夫欲妙識玄宗。必先審其愚智。若欲審其愚智。善須明其真妄。若欲明其真妄。復當究其名體。名體若分。真妄自辨。真妄旣辨。愚智迥然。是以愚無了智之能。智有達愚之實。故知非智無以明其真妄。非智莫能辨其名體。何者。或有名而無體。或因體而施名。名體混緒。實難窮究。

矣。是以體非名而不辨。名非體而不施。言體必假其名。語名必藉其體。今之體外施名者。此但名其無體耳。豈有體當其名耶。譬夫兔無角而施名。此則名其無角耳。豈有角當其名耶。無體而施名者。則名無實名也。名無實名。則所名無也。所名既無。能名不有也。何者。設名本以名其體。無體何以當其名。言體本以當其名。無名何以當其體。體無當而非體。名無名而非名。此則何獨體而元虛。亦乃名而本寂也。然而無體當名。由來若此。名之體當。何所云爲。夫體不自名。假他名而名我體。名非自設。假他體而施我名。若體

之未形。則名何所名。若名之未設。則體何所明。然而明體雖假其名。不爲不名而無體耳。設名要因其體。無體則名之本無。如是則體不名生。名生於體耳。今之體在名前。名從體後。辨者如此。則設名以名其體。故知體是名源耳。則名之所由。緣起於體。體之元緒。何所因依。夫體不我形。假緣會而成體。緣非我會。因會體而成緣。若體之未形。則緣何所會。若緣之未會。則體何所形。體形則緣會而形。緣會則體形而會。體形而會。則明形無別會。形無別會。則會本無也。緣會而形。則明會無別形。會無別形。則形本無也。是以萬

法從緣無自體耳。體而無自。故名性空。性之既空。雖緣會而非有。緣之既會。雖性空而不無。是以緣會之有。有而非有。性空之無。無而不無。何者。會卽性空。故言非有。空卽緣會。故曰非無。今言不有不無者。非是離有別有一無也。亦非離無別有一有也。如是則明法非有無。故以非有非無名耳。不是非有非無。既非有無。又非非有。非非無也。如是何獨言語道斷。亦乃心行處滅也。

勸友人書第九 大師答朗禪師書

婺州浦陽縣佐溪山朗禪師召大師山居書

禪宗永嘉集

三

自到靈谿。泰然心意。高低峯頂。振錫常游。石室巖龕。拂乎宴坐。青松碧沼。明月自生。風掃白雲。縱目千里。名花香果。峯鳥銜將。猿嘯長吟。遠近皆聽。鋤頭當枕。細草爲氈。世上崢嶸。競爭人我。心地未達。方乃如斯。倘有寸陰。願垂相訪。

自別以來。經今數載。遙心眷想。時復成勞。忽奉來書。適然無慮。不委信後。道體如何。法味資神。故應清樂也。玄覺麤得延時。欽詠德音。非言可述。承懷節操。獨處幽棲。泯跡人間。潛形山谷。親朋絕往。鳥獸時遊。竟夜緜緜。終朝寂寂。視聽都息。心累闐然。獨宿孤峯。端

居樹下。息繁飡道。誠合如之。然而正道寂寥。雖有修而難會。邪徒誼擾。乃無習而易親。若非解契玄宗。行符真趣者。則未可幽居抱拙。自謂一生歟。應當博問先知。伏膺誠懇。執掌屈膝。整儀端容。曉夜忘疲。始終虔仰。折挫身口。蠲矜怠慢。不顧形骸。專精至道者。可謂澄神方寸歟。夫欲採妙探玄。實非容易。決擇之次。如履輕冰。必須側耳目而奉玄音。肅情塵而賞幽致。忘言宴旨。濯累殫微。夕惕朝詢。不濫絲髮。如是則乃可潛形山谷。寂累絕羣哉。其或心徑未通。矚物成壅。而欲避誼求靜者。盡世未有其方。況乎鬱鬱長林。峨

峨聳峭。鳥獸嗚咽。松竹森梢。水石崢嶸。風枝蕭索。藤蘿縈絆。雲霧氤氳。節物衰榮。晨昏眩晃。斯之種類。豈非喧雜耶。故知見惑尙紆。觸途成滯耳。是以先須識道。後乃居山。若未識道而先居山者。但見其山。必忘其道。若未居山而先識道者。但見其道。必忘其山。忘山則道性怡神。忘道則山形眩目。是以見道忘山者。人間亦寂也。見山忘道者。山中乃喧也。必能了陰無我。無我誰住人間。若知陰入如空。空聚何殊山谷。如其三毒未祛。六塵尙擾。身心自相矛盾。何關入山之喧寂耶。且夫道性沖虛。萬物本非其累。真慈平等。聲

色何非道乎。特因見倒惑生。遂成輪轉耳。若能了境  
非有。觸目無非道場。知了本無。所以不緣而照。圓融  
法界。解惑何殊。以含靈而辨悲。卽想念而明智。智生  
則法應圓照。離境何以觀悲。悲智理合。通收。乖生何  
以能度。度盡生而悲大。照窮境以智圓。智圓則喧寂  
同觀。悲大則怨親普救。如是則何假長居山谷。隨處  
任緣哉。況乎法法虛融。心心寂滅。本自非有。誰強言  
無。何喧擾之可喧。何寂靜之可寂。若知物我冥一。彼  
此無非道場。復何徇喧雜於人間。散寂寞於山谷。是  
以釋動求靜者。憎枷愛杻也。離怨求親者。厭檻欣籠

也。若能慕寂於喧。市廛無非宴坐。微違納順。怨債由  
來善友矣。如是則劫奪毀辱。何曾非我本師。叫喚喧  
煩。無非寂滅。故知妙道無形。萬像不乖其致。真如寂  
滅。眾響靡異其源。迷之則見倒惑生。悟之則違順無  
地。闐寂非有。緣會而能生。峨嶷非無。緣散而能滅。滅  
既非滅。以何滅滅。生既非生。以何生生。生滅既虛。實  
相常住矣。是以定水滔滔。念塵而不洗。智燈了了。  
何惑霧而不祛。乖之則六趣循環。會之則三塗迥出。  
如是則何不乘慧舟而遊法海。而欲駕折軸於山谷  
者哉。故知物類紘紘。其性自一。靈源寂寂。不照而知。

實相天真靈智非造。人迷謂之失。人悟謂之得。得失在於人。何關動靜者乎。譬夫未解乘舟。而欲怨其水曲者哉。若能妙識玄宗。虛心冥契。動靜長短。語默恆規。寂爾有歸。恬然無間。如是則乃可逍遙山谷。放曠郊塵。遊逸形儀。寂怕心腑。恬澹息於內。蕭散揚於外。其身兮若拘。其心兮若泰。現形容於寰宇。潛幽靈於法界。如是則應機有感。適然無準矣。因信略此。餘更何申。若非志朋。安敢輕觸。宴寂之暇。時暫思量。予必誑言。無當看竟。迴充紙燼耳。不宣。同友玄覺和南發願文第十

稽首圓滿徧知覺。寂靜平等本真源。相好嚴特非有無。慧明普照微塵刹。稽首湛然真妙覺。甚深十二脩多羅。非文非字非言詮。一音隨類皆明了。稽首清淨諸賢聖。十方和合應真僧。執持禁戒無有違。振錫攜餅利含識。卵生胎生及溼化。有色無色想非想。非有非無想雜類。六道輪迴不暫停。我今稽首歸三寶。普爲眾生發道心。羣生沈淪苦海中。願因諸佛法僧力。慈悲方便拔諸苦。不捨弘願濟含靈。化力自在度無窮。恆沙眾生成正覺。說此偈已。我復稽首歸依十方三世一切諸佛法僧前。承三寶力。志心發願。修無上

菩提契從今生。至成正覺。中間決定勤求不退。未得道前。身無橫病。壽不中天。正命盡時。不見惡相。無諸恐怖。不生顛倒。身無苦痛。心不散亂。正慧明了。不經中陰。不入地獄。畜生餓鬼。水陸空行。天魔外道。幽冥鬼神。一切雜形。皆悉不受。長得人身。聰明正直。不生惡國。不值惡王。不生邊地。不受貧苦。奴婢女形。黃門二根。黃髮黑齒。頑愚暗鈍。醜陋殘缺。盲聾瘖瘂。凡是可惡。畢竟不生。出處中國。正信家生。常得男身。六根完具。端正香潔。無諸垢穢。志意和雅。身安心靜。不貪瞋癡。三毒永斷。不造眾惡。恆思諸善。不作王臣。不爲

禪宗永嘉集

三

使命。不願榮飾。安貧度世。少欲知足。不長畜積。衣食供身。不行偷盜。不殺眾生。不噉魚肉。敬愛含識。如我無異。性行柔輒。不求人過。不稱己善。不與物諍。怨親平等。不起分別。不生憎愛。他物不恡。自財不吝。不樂侵犯。恆懷質直。心不卒暴。常樂謙下。口無惡說。身無惡行。心不諂曲。三業清淨。在處安隱。無諸障難。竊盜劫賊。王法牢獄。枷杖鉤鎖。刀鎗箭槊。猛獸毒蟲。墮峯溺水。火燒風飄。雷驚霹靂。樹折巖頽。堂崩棟朽。搗打怖畏。趁逐圍繞。執捉繫縛。加誣毀謗。橫枉鉤牽。凡諸難事。一切不受。惡鬼飛災。天行毒癘。邪魔魍魎。若河



若海崇山穹嶽。居止樹神。凡是靈祇。聞我名者。見我形者。發菩提心。悉相覆護。不相侵惱。晝夜安隱。無諸驚懼。四大康強。六根清淨。不染六塵。心無亂想。不有昏滯。不生斷見。不著空有。遠離諸相。信奉能仁。不執己見。悟解明了。生生修習。正慧堅固。不被魔攝。大命終時。安然快樂。捨身受身。無有怨對。一切眾生。同爲善友。所生之處。值佛聞法。童真出家。爲僧和合。身身之服。不離袈裟。食食之器。不乖孟鉢。道心堅固。不生憍慢。敬重三寶。常修梵行。親近明師。隨善知識。深信正法。勤行六度。讀誦大乘。行道禮拜。妙味香華。音聲

讚頌。燈燭臺觀。山海林泉。空中平地。世間所有。微塵已上。悉持供養。合集功德。迴助菩提。思惟了義。志樂閒靜。清素寂默。不愛喧擾。不樂羣居。常好獨處。一切無求。專心定慧。六通具足。化度眾生。隨心所願。自在無礙。萬行成就。精妙無窮。正直圓明。志成佛道。願以此善根。普及十方界。上窮有頂。下極風輪。天上人間。六道諸身。一切含識。我所有功德。悉與眾生共。盡於微塵劫。不惟一眾生。隨我有善根。普皆充熏飾。地獄中苦惱。南無佛法僧。稱佛法僧名。願皆蒙解脫。餓鬼中苦惱。南無佛法僧。稱佛法僧名。願皆蒙解脫。畜生

中苦惱。南無佛法僧。稱佛法僧名。願皆蒙解脫。天人  
阿脩羅。恆沙諸含識。八苦相煎迫。南無佛法僧。因我  
此善根。普免諸纏縛。南無三世佛。南無脩多羅。菩薩  
聲聞僧。微塵諸聖眾。不捨本慈悲。攝受羣生類。盡空  
諸含識。歸依佛法僧。離苦出三塗。疾得超三界。各發  
菩提心。晝夜行般若。生生勤精進。常如救頭然。先得  
菩提時。誓願相度脫。我行道禮拜。我誦經念佛。我修  
戒定慧。南無佛法僧。普願諸眾生。悉皆成佛道。我等  
諸含識。堅固求菩提。頂禮佛法僧。願早成正覺。

禪宗永嘉集

禪宗永嘉集

三

三歸優婆塞顯湛爲 父敬刊

永嘉證道歌

唐慎水沙門玄覺撰

君不見。絕學無爲閒道人。不除妄想不求真。無明實性卽佛性。幻化空身卽法身。法身覺了無一物。本源自性天真佛。五陰浮雲空去來。三毒水泡虛出沒。證實相。無人法。剎那滅卻阿鼻業。若將妄語誑眾生。自招拔舌塵沙劫。頓覺了。如來禪。六度萬行體中圓。夢裏明明有六趣。覺後空空無大千。無罪福。無損益。寂滅性中莫問覓。比來塵鏡未曾磨。今日分明須剖析。誰無念。誰無生。若實無生無不生。喚取機關木人問。

永嘉證道歌

一

求佛施功早晚成。放四大。莫把捉。寂滅性中隨飲啄。諸行無常一切空。卽是如來大圓覺。決定說。表真僞。有人不肯任情徵。直截根源佛所印。摘葉尋枝我不能。摩尼珠。人不識。如來藏裏親收得。六般神用空不空。一顆圓光色非色。淨五眼。得五力。唯證乃知難可測。鏡裏看形見不難。水中捉月爭拈得。常獨行。常獨步。達者同遊涅槃路。調古神清風自高。貌頽骨剛人不顧。窮釋子。口稱貧。實是身貧道不貧。貧則身常披縷褐。道則心藏無價珍。無價珍。用無盡。利物應機終不吝。三身四智體中圓。八解六通心地印。上士一決

一切了。中下多聞多不信。但自懷中解垢衣。誰能向外誇精進。從他謗。任他非。把火燒天徒自疲。我聞恰似飲甘露。銷融頓入不思議。觀惡言。是功德。此卽成吾善知識。不因訕謗起冤親。何表無生慈忍力。宗亦通。說亦通。定慧圓明不滯空。非但我今獨達了。恆沙諸佛體皆同。師子吼。無畏說。百獸聞之皆腦裂。香象奔波失卻威。天龍寂聽生欣悅。遊江海。涉山川。尋師訪道爲參禪。自從認得曹谿路。了知生死不相關。行亦禪。坐亦禪。語默動靜體安然。縱遇鋒刀常坦坦。假饒毒藥也閒閒。我師得見然燈佛。多劫曾爲忍辱仙。

永嘉證道歌

二

幾回生。幾回死。生死悠悠無定止。自從頓悟了無生。於諸榮辱何憂喜。入深山。住蘭若。岑峯幽邃長松下。優游靜坐野僧家。閑寂安居實蕭灑。覺卽了。不施功。一切有爲法不同。住相布施生天福。猶如仰箭射虛空。勢力盡。箭還墜。招得來生不如意。爭似無爲實相門。一超直入如來地。但得本。莫愁末。如淨瑠璃含寶月。旣能解此如意珠。自利利他終不竭。江月照。松風吹。永夜清宵何所爲。佛性戒珠心地印。霧露雲霞體上衣。降龍鉢。解虎錫。兩銚金環鳴歷歷。不是標形虛事持。如來寶杖親蹤跡。不求真。不斷妄。了知二法空。

無相。無相無空無不空。卽是如來真實相。心鏡明鑒  
無礙。廓然瑩徹。周沙界。萬象森羅。影現中。一顆圓光  
非內外。豁達空。撥因果。莽莽蕩蕩。招殃禍。棄有著空  
病亦然。還如避溺而投火。捨妄心。取真理。取捨之心  
成巧僞。學人不了用修行。深成認賊將爲子。損法財  
滅功德。莫不由斯心意識。是以禪門了卻心。頓入無  
生知見力。大丈夫。秉慧劍。般若鋒。兮金剛。非但空  
摧外道心。早曾落卻天魔膽。震法雷。擊法鼓。布慈雲  
兮灑甘露。龍象蹴踏。潤無邊。三乘五性。皆醒悟。雪山  
肥膩。更無雜。純出醍醐。我常納。一性圓通。一切性。一

永嘉證道歌

三

法徧含一切法。一月普現一切水。一切水月一月攝。  
諸侯法身入我性。我性同共如來合。一地具足一切  
地。非色非心非行業。彈指圓成八萬門。剎那滅卻三  
祇劫。一切數句非數句。與吾靈覺何交涉。不可毀。不  
可讚。體若虛空。勿涯岸。不離當處常湛然。覓卽知君  
不可見。取不得。捨不得。不可得中只麼得。默時說。說  
時默。大施門開無壅塞。有人問我解何宗。報道摩訶  
般若力。或是或非人不識。逆行順行天莫測。吾早曾  
經多劫修。不是等閒相誑惑。建法幢。立宗旨。明明佛  
敕曹溪是。第一迦葉首傳燈。二十八代西天記。法東

流入此土。菩提慧磨爲初祖。六代傳衣天下聞。後人  
得道何窮數。眞不立。妄本空。有無俱道不空空。二十  
空門元不著。一性如來體自同。心是根。法是塵。兩種  
猶如鏡上痕。痕垢盡除光始現。心法雙忘性卽眞。嗟  
末法。惡時世。眾生福薄難調制。去聖遠兮邪見深。魔  
強法弱多怨害。聞說如來頓教門。恨不滅除令瓦碎。  
作在心。殃在身。不須冤訴更尤人。欲得不招無間業。  
莫謗如來正法輪。旃檀林。無雜樹。鬱密森沈師子住。  
境淨林間獨自遊。走獸飛禽皆遠去。師子兒。眾隨後。  
三歲便能大哮吼。若是野干逐法王。百年妖怪虛開

永嘉證道歌

四

口。圓頓教。勿人情。有疑不決直須爭。不是山僧逞人  
我。修行恐落斷常坑。非不非。是不是。差之毫釐失千  
里。是則龍女頓成佛。非則善星生陷墜。吾早年來積  
學問。亦曾討疏尋經論。分別名相不知休。入海算沙  
徒自困。卻被如來苦訶責。數他珍寶有何益。從來踏  
蹬覺虛行。多年枉作風塵客。種性邪。錯知解。不達如  
來圓頓制。二乘精進勿道心。外道聰明無智慧。亦愚  
癡。亦小駮。空拳指上土實解。執指爲月。枉施功。根境  
法中虛捏怪。不見一法卽如來。方得名爲觀自在。了  
卽業障本來空。未了應須還夙債。饑逢王膳不能食。

病遇醫王爭得瘥。在欲行禪知見力。火中生蓮終不壞。勇施犯重悟無生。早時成佛于今在。獅子吼。無畏說。深嗟懵懂頑皮。知犯重障菩提。不見如來開祕訣。有二比丘犯姪殺。皮<sub>三</sub>螢光增罪結。維摩大士頓除疑。猶如赫日銷霜雪。不思議。解脫力。妙用恆沙也無極。四事供養敢辭勞。萬兩黃金亦銷得。粉骨碎身未足酬。一句了然超百億。法中王。最高勝。恆沙如來同共證。我今解此如意珠。信受之者皆相應。了了見<sub>無</sub>一物亦無人。亦無佛。大千沙界海中漚。一切聖賢如電拂。假使鐵輪頂上旋。定慧圓明終不失。日可冷。月可熱。眾魔不能壞。真說象駕崢嶸。途誰見。豈能拒轍。大象不遊於兔徑。大悟不拘於小節。莫將管見謗蒼蒼。未了吾今爲君訣。

永嘉證道歌終

三歸優婆塞顯湛爲 父敬刻

計刻禪宗永嘉集并證道歌連圈計字一萬六千  
二百零六箇付刻資<sub>五</sub> 六元正

民國十一年 四月 北京刻經處識

